

榆次縣志卷之十

列女傳上

五代

漢高祖皇后李氏父爲農高祖少爲軍娶后及貴封魏國夫人開運四年高祖起兵晉陽欲斂於民以賞軍后諫曰今起事號爲義兵民未知惠而先奪其財非救民意也請悉出後宮所有雖不足士亦不怨矣高祖斂容謝之高祖稱帝立爲后隱帝即位尊爲皇太后及郭威舉兵隱帝欲自將討之后止之曰郭威本吾家人非危疑何肯至此今若按兵無動以詔諭威

威必有說則君臣之際庶幾尚全隱帝不聽已而郭
威入汴舉事皆稱太后旨時議立湘陰公贇贇未至
乃請太后臨朝俄而威爲帝請以母事太后上尊號
曰昭聖皇太后終於周顯德元年

按五代史云李后晉陽人褚志則以爲榆次人且
指鳴李村爲后故居麻池井汲之跡尚存或鳴李
村亦當日晉陽地褚志又云高祖贅后家其父兄
逐去之勒后改適后苦節不易云云考五代史有
高祖牧馬晉陽入后家劫娶之語則非贅可知又
李洪信傳昭聖太后弟六人洪信居長固未言后

有兄史又稱洪信三從高祖兵間則父兄斥逐勒
后改適殆委巷之談欲彰后節非故實也至高祖
微時常居偷次后亦從焉則以敘列女之首

元

王氏舉人格忠妻忠亡有豪貴欲娶之王曰吾爲士人
婦以孤存不即死志未可奪也大德八年旌表

李氏者趙信妻也年二十而信死遺一子李撫長之守
節四十年

薄氏康贊妻贊死家貧薄紡織養翁姑婦道咸備人稱
其難

鄭氏張恭妻早寡食貧荼苦歷數十年志不少易至順
三年旌表

段氏鄭和甫妻年少有淑德和甫早死段貧甚無二志
與孤子相依者三十年至正七年旌表

明

溫氏馬守道妻守道死或憐其貧勸改適溫曰吾死不
惜貧亦何患耶洪武十三年旌表

周氏趙旭妻旭病死欲自殺以從家人力止之乃已厲
操終其身

劉氏杜仲賢妻仲賢死人有以他意諷之者劉完節自

守以壽終

賈氏任整妻也整客死京師賈年方少泣謂家人曰所以不即死者以有老母與孤在也整柩歸賈葬之齋居凡六十五年

郝能之女許字鄭銓未婚而銓卒女聞之謂父母曰雖未事銓然已許之矣義不負也遂往銓家服喪奉銓父母終其身

劉氏適賈濬年二十五而寡惟遺二女劉竟守其志以老卒年七十七

冀氏年十九歸於寇讓有子天錫三歲而讓死其父兄

使再嫁冀泣曰我去夫不祀矣卒撫育天錫以至成立焉

侯氏父爲醫官十七嫁張琳十九有子二十而琳死琳有資產家人謀奪之因迫侯使他適侯堅不肯家人竟奪其田里中或以孤且寡加欺陵侯終不爲動持門戶自若嘉靖中有司奏旌之侯卒幾九十矣光祿卿周鈇高其風爲志墓焉

李氏固安教諭李廷秀女也幼從廷秀學讀書長歸仲顯嘉靖辛丑北寇至李與家人避兵堡寨中明日寇來攻破寨掠婦女及李李張目罵曰敢犯我乎自寨

出投崖死之

邑掾段廷相妻王氏有志節段疾將死問王汝如何曰
從君往耳段旣死王慟哭方自溺於井其姑知而救
止之親人守視王給守者出竟縊死

安氏城南關人爲郭思德妻嘉靖辛丑北寇至思德以
其家避亂猝與寇遇安與二女俱被執時二女皆長
且有姿安懼其見汚行及風雲雷雨壇西見有井安
呼二女急躍入俱死焉守陴者見而傷之寇去出屍
以葬鄰里爲刻石於井旁紀其烈

范儒女幼許婚里人續文博文博客遊久流離於外儒

約文博不歸而女年益長欲爲改聘女誓不許也其
後文博還女已四十矣卒爲夫婦生男女范氏
以壽終

戴秋姐者縣人戴宛女也隆慶中隨母行遇賊賊殺母
而以刃劫秋姐秋姐罵拒之遂見殺

武氏李應麒妻歸應麒家未一年其姑病篤應麒請醫
不效又家貧市遠母思食肉不能具武氏乃割其左
肱肉烹以進於姑姑即愈萬厯中有司旌其孝

凡行事可書皆爲列女不獨孀嫠也史例則然故
採入

諸生寇一龍妻順天府尹李敏女也一龍以母病憂勞致疾而死李年始十五日夕泣曰將從一龍竟飲毒而死

郝氏民田仲傑妻二十夫亡子奎方二歲郝執節自守撫奎而長之萬曆九年奎卒遺孫應科尚幼復撫而長之其後應科復卒郝寡居四十餘年至孤苦藉縫紉自活而田氏三世賴以繼焉遠近聞者憫而加敬縣有司出粟帛以給而表其門

馬氏生員李春泰之繼母甲申之難李自成賊蹂榆次因掠得馬馬不肯辱罵賊投井死春泰有姊嫁王

本三見元 卷一 五
氏亦恥爲賊汚與賊相拒賊以火烙之而死又有侯
氏者爲生員張翀妻與翀妹及翀妾王避賊地窖中
恐爲所辱一家十三人皆自沈井中

自洪武至萬曆之世其間以節著者又有諸生閻永
甯妻侯氏里人寇穆妻張氏白通判女張景之妻白
氏邑人張英妻侯氏諸生王廷訓妻張氏高翔妻郝
氏國子生寇隅妻郭氏舉人桂廷輔妻單氏永康里
人范成宗妻胡氏諸生李應期妻原氏中郝里人白
玉妻李氏民王朝義妻郝氏諸生鞏圖年妻段氏賈
昭妻趙氏皆以狀聞被旌於官者也

國朝

郭氏諸生李廉妻歸廉四載廉死郭時僅二十二歲無
翁姑父母熒熒獨居歷貧苦四十餘年俟三歲子映
桃稍長力教訓之得爲博士弟子其後巡按御史來
激揚風俗首表郭氏且令縣有司歲給布粟以贍云
張氏里人鄭九鼎妻十九生子三月而夫亡人以其貧
無食多勸更適者張曰吾甯不知去或得飽留則餓
且困然命若是矣生與吾子同處死與吾夫同穴志
自甘之誰能奪哉順治中知縣金世禎表其門與張
同時十九歲寡而以節著者有姚定妻郭氏韓接愈

妻侯氏

郭氏庠生賈德芳母二十而寡勤苦潔白爲鄉里所敬
憫郡縣並旌焉其二十一而寡者有原建邦妻張氏
二十四而寡者有庠生王之相妻姬氏二十五而寡
者有庠生許台衡母馬氏二十六而寡者有孫天德
妻梁氏張氏守節五十二年姬氏四十六年馬氏三
十年馬父亦諸生也梁氏至五十七年其年甚艾而
夫死不嫁勵節以終者又有白運亨妻張氏家貧爲
人縫紉以自食庠生何兆禎妻馬氏王珍妻侯氏皆
善事舅姑白世奇妻王氏嚴於教子王沼妻齊氏勤

紡織茹辛苦庠生施守輝母張氏郭養賢妻楊氏續志稱養賢早死楊頻遭饑饉冰霜逾勵人無遺議云張氏李映新妻年三十夫卒事瞽姑以孝登牀拭穢無厭怠色家貧歲僅得粗穀三石勤機杼出布易錢常使姑甘旨無缺焉

胡氏武舉藥菖繼母也嫁二年而夫死胡撫前子若已子然恩義並篤前子長爲之娶妻教使從學中武科者二人皆胡訓育之所致也其他以節聞者庠生郭定民妻寇氏庠生李秉禎妻左氏武舉王太平妻李氏李氏常嚙指自矢以絕勸嫁者武生王兆龍母魏

氏庠生李曦妻桑氏桑氏夫死不食期以身殉人救
之得免也郭卿字母楊氏王國秀妻寇氏夫亡無子
俱守節至四十餘年又有張應奇妻任氏爲縣令所
旌韓國松妻王氏皆在順治中及康熙初

羅氏庠生李桐椿妻桐椿母張病羅割股以進嗣以父
三屺病篤再割之創甚而卒年三十一時康熙二十
六年也

張典妻王氏成煜妻李氏康熙妻陳氏劉玉妻段氏張
惟煥母冀氏李發正妻崔氏白光彩妻張氏施世良
妻武氏並二十八而寡王氏至七十三歲武氏至八

十六歲以老壽終崔守志四十二年冀三十五年段
三十二年陳與李皆三十一年並稱苦節張在康熙
中知縣祖良材已予旌

鄭氏喬乙科妻二十五寡二子皆乳裸無舅姑伯叔及
母家可恃者蕭條孤子常歷危苦然志終身不移鄭
之生也爲明崇禎元年卒於康熙三十八年

龐氏者民李進選妻早寡鄰有惡少年李正者夜竊啓
其門入逼之龐拒甚峻以爪裂正膚正怒罵去龐識
其聲忿甚棄幼子投井中死康熙四十三年旌

要氏適張大成甫十七明年成得疾要氏出簪珥爲營

醫藥日夕呼天祈以身代及成將終語要使自爲計則泣曰守志亦非所願終期與子同歸泉下耳自大成初病至卒要氏衣帶不解者六月大成既殮明日要遂自縊時方甚暑露屍逾日顏色不變是歲爲雍正巳酉知縣鄒雙閭之爲表其閭初有鄰人婦知大成病必死意其且改適試語挑之要怒斥焉至是果死人爭嘆其烈

孫氏馮應光妻韋氏鄭寰妻王氏胡有宰妻武氏褚極生妻楊氏趙環妻皆二十四而寡孫卒年八十三前令劉星表焉韋子三台遺腹也韋年至七十八歲王

守志三十三年武守志三十八年楊守志三十一年
家並貧窶云陶氏劉印妻曹氏白養論妻田氏溫恭
仁妻郝氏白喬妻皆二十五而寡田年至八十四尚
能事紡績陶亦八十四曹與郝守志三十餘年皆爲
人所稱

田世興者永康鎮農家子也妻任氏二十七而寡遺孤
美方八歲任撫之成立矢志五十九年而終知縣荆
振曰旌其門

鄭氏郭塘妻夫死無子惟老姑在鄭年二十四執節不
嫁人有勸之者曰我如他適姑將誰事且我亦何以